

Ëura Nul

Vester “autramënter” nes toca, dantaldut te Südtirol

Canche l Deutschland-Paejes Tudësc de Hitler l’à data su, zënza cundizions, ai 8 de mei dl 1945, finova la Segonda Viera Mundiela cun si passa 60 milions de morc.

Do la fin dla viera iel mé unit ora do y do tan grant che ie stat l genozide fat dal rejim criminel nazista contra 6 milions de judieres, sinti y roma, omossessuei, dejabli y dessidënc politics. L delirium raziel fascista y naziunelsozialista, l’idea de na raza patrona te n Stat totaliter cun un n Führer o Duce sëul, à purtà a n mazamënt de massa, urganisà tragicamënter a puntin, de ëi, ëiles y mutons/ans, ala sotmiscion y al stermin de dut chël che univa etichetà coche “devià”, “degenerà” “melsann “ y “autramënter”.

Dan 80 ani – do la deliberazion da pert di americans, di britanics y dl’armeda sovietica – àl te Europa batù l’Ëura Nul, che ulova dì l mesun de pudëi scumencé da nuef, y autramënter, miec!

La Detlarazion universela di dërc umans da pert dla Nazions Unides y la costituzions nueves democratiches y antifascistes de do la viera ie l’esprescion de chël che nes ie unì nsenià tres chësc capitul, che ie l plu scur dla storia dl’umanità, dantaldut ti Paejes Tudësc, tl’Austria y tla Talia:

duta la persones ie medemes dan la lege, deguni ne possa unì descriminà y, dantaldut, muessa la denità umana unì respetada y ne possa nia unì tucheda negativamënter. Deguna lege fata dala jënt ne possa jì contra chisc prinzijs y i dërc umans fundamentei. La filosofa

Hannah Arendt à auzà ora, cun la frasa de zitazion de Kant “Deguni ne à l dërt de ulghé”, l cunzet che n ne possa nia jì demez da si responsablità persunela se ascundan do la viertla de messëi fé alsënn te na maniera viercia a ncëries nia umanes. Chësta zitazion de Arendt ie al didancuei na risposta democratica al crëier, ulghé y cumbater fascista- “CREDERE OBBEDIRE COMBATTERE” fascista - dan al relief de Mussolini sun la Plaza dla Sunieria a Bulsan.

l’Ëura Nul di 8 de mei dl 1945 à senià n scumenciamënt nuef nce per la provinzia de Bulsan. Do la esperienza pesocia de doi ditatures - te chëles che la jënt de Südtirol ne n’ie nia mé stata vitima ma nce cernefica, che à torturà y mazà – ie propi i uemes y l’ëiles dla registënza contra l fascism y l nazism che à, propi n chël di, lascia pro che n ëssa pudù mëter su n parit che reprejentëssa i nteresc dla mendranza austriaca tla Talia.

L dejidere da pert dla jënt de Südtirol de jì de reviers tl’Austria ne n’ie nia unì lascià pro dai Aleac, ma l Tratat de Paris di 5 de setëmber dl 1946 à dat dant che la mendranzes dl Südtirol messëssa unì scunedes y che ala Provinzia de Bulsan ti unìssel cunzedù l’autonomia.

La streda per l’atuazion iusta y efetiva de chësc tratat ie stata longia y ërta, nce tla Talia democratica de do la viera. Ma zënza la deliberazion da pert di Aleac, zënza la costituzions democrätiches y zënza la crëta de viers dl dërt nternaziunel, crëta a chëla che n ti ova inò crëta, per tò ca n juech de paroles, ne fossa nosta autonomia – che vën al didancuei ududa coche n mudel – nia unida a s’l dé, nsci coche niancanó l’Europa Unida.

Nce la cuoperazion europea, che à purtà a ti vester ai naziunalisms y a ot dejeneies de pesc, segurëza y prusperità, à la fundamënta te chësta Ëura Nul

Dantaldut nëus te Südtirol, che union tla Talia udui coche
“autramënter”, messessan avëi l cunsavëi di 8 de mei, di che
reprejënta la deliberazion y l scumenciamënt nuef, y de nes bater uni
di per la democrazia, per la lidëza, per la iustizia y per l dërt de vester
“autramënter”.